

LA FONTANA E LE LAVANDARE

*Eco! La fonte la se prepara, missiando l'acqua
E osando contenta: "Done!!! L'è luni!!!
Dai che ve speto par lavar le robe!!!".*

*E lore, co' le barele soto el brasso
E le secie porté, a fadiga, par man,
le se imbarca de bona lena, a la fonte...*

*E le ciacola forte, starnassando,
come un s-ciapo de anare in sboresso,
molè in giro par la corte...*

*E la baruffa!!! Par ciaparse el posto meo,
sbotassandose spesso e volentieri,
par le strasse mal lavé e mal resenté...*

*E le sbate!!! Strucando ste pore robe,
con man sapienti e generose,
de n'arte che sà da neto...*

*Ma l'acqua ciara, la se grata su par le rive,
come un butin che se sfregola i oci,
sveandose da un bel sogno ormai svaniò...*

*E pì no la se sente cular
Da le tante beghe,
ciacole e canson de lavandare...*

*Che mai stufe, le missia co' le man
el sùdor impastà col saòn,
con gran cura, senza mai fermarse...*

*E pi no la sente doparar la so acqua vergine,
par lavar quatro strasse infagoté e sporche
de fadiga e de tante ore passé in meso ai campi...*

*Ogni sbatùà, su la barela,
l'è come na sbrinsola de tempo,
che smorfioseta la se olta indriò.*

*E l'acqua vergine, de la fonte,
in sboresso, la speta de poder zugar,
come n'a olta, co' le lavandare...*

*Ormai strache... Sfinie... Bagné,
fin' sima al col e coi diei slisi
e tuti roti, a forsa de fregar.*

*Ma le barele smarse, consumé da l'acqua,
ormai j è sté taché a un ciodo,
o brusé nel fogo, parché pì no le serve...*

*E la fontana, impasiente,
ancora la le speta... La le chiama...
Ma le lavandare... No le risponde pì.*

(Poesia di Nadia Scudellari - Cazzano di Tramigna - Verona)